

novel   
come!

MISTERI  
AHLI BARU

*-The-*  
*Wannababes*

HAZIQ RIDZUAN

# Misteri Ahli Baru The Wannababes

“Cuba lihat budak itu. Manusia ataupun raksasa?”

“Yalah, hodoh betul! Sampai tidak sanggup saya hendak melihatnya!”

“Jangan kawan dengan dia... nanti terjangkit menjadi hodoh juga!”

Suara-suara bisikan pelajar itu cukup jelas didengari olehnya. Pedih dan tajam menusuk kalbu menghiris perasaannya. Air mata mengalir tanpa disuruh. Dia tidak dapat menahan sebak mendengar kutukan dan ejekan yang ditujukan khusus buat dirinya itu.



## *Misteri Ahli Baru The Wannababes*

Sesungguhnya, dia tidak meminta dilahirkan dengan wajah seperti itu. Sungguhpun Rina berkulit cerah, tinggi dan kurus. Namun bibirnya sumbing, bergigi jongang, berhidung penyek dan kembang serta masalah jerawat di atas kulit. Wajah yang sungguh kronik, berminyak dan bernanah.

Sejak kecil, Izrina Amanda menghadapi masalah rendah keyakinan diri dek kerana wajahnya yang tidak begitu menarik itu telah menakutkan ramai orang. Akibatnya, Izrina membesar sebagai kera sumbang dan tidak mempunyai rakan taulan seperti kebanyakan remaja lain. Gelaran seperti 'Raksasa', 'Makhluk Asing', 'Nenek Kebayan', dan 'Si Hodoh' sudah begitu sehati dengan dirinya.

Kadang-kadang Izrina berasa cemburu melihat orang lain yang memiliki wajah yang cantik dan mempunyai ramai kawan. Dia tidak pernah mengenal erti persahabatan kerana tidak ada yang sudi hendak mendekati dirinya.

“Ibu, mengapa nasib Rina sungguh malang?” Pada suatu hari, Rina menyuarakan isi hatinya kepada ibu sendiri.

“*Hish*, kenapa pula Rina kata begitu?” Ibu Izrina iaitu Puan Maimunah yang sedang sibuk melipat baju, kelihatan tersentak dengan pertanyaan anaknya itu.

“Yalah, Rina dilahirkan dengan wajah hodoh seperti ini. Langsung tiada seorang pun yang sanggup mendekati Rina. Di sekolah, Rina selalu sahaja disisihkan dan dikutuk oleh pelajar lain. Kalaulah Rina secantik mereka ini...,” Wajah Rina kelihatan sedih dan menunduk sahaja. Nada suaranya juga rendah dan perlahan. Majalah Kpop di tangannya ditatap dengan penuh kekaguman.

“Biarkanlah mereka, Rina. Kita tidak mampu hendak menutup mulut semua orang.” Puan Maimunah yang memahami perasaan anaknya itu hanya mampu memujuk dengan kata-kata.

## *Misteri Ahli Baru The Wannababes*

“Ibu tentu sedih dan malu memiliki anak yang hodoh seperti Rina.” Saat menuturkan kata-kata itu, air mata Rina mengalir laju. Terus dilap air mata yang berlinangan dengan hujung lengan bajunya.

“Ibu tidak pernah menilai kamu dari paras rupa. Kamulah satu-satunya permata hati ibu. Tidak pernah terlintas untuk berasa malu mahupun sedih kerana dikurniakan kamu di dalam kehidupan ibu.” Puan Maimunah sudah memeluk anak daranya yang seorang itu dengan erat. Luluh hatinya mendengar kata-kata yang diungkapkan oleh anaknya itu. Dia tahu Rina banyak menderita sepanjang hidupnya. Dia tidak dapat memberikan kehidupan yang sempurna buat Rina. Suaminya hanya bekerja sebagai tukang cuci pinggan di sebuah restoran. Dia pula mendapat simpati pemilik restoran tersebut iaitu Dato’ Megat Tuah dan dibenarkan bekerja sebagai pembantu rumah di kediamannya.

Walaupun begitu, pendapatan mereka hanya cukup-cukup makan sahaja. Tidak

dapatlah dia memanjakan Rina dengan kehidupan yang mewah. Tambahan pula, Rina tidak dikurniakan wajah secantik manusia lain. Tentu banyak sengsara yang perlu ditelan oleh anaknya itu.

“Mengapalah Rina ditakdirkan berwajah hodoh ya, ibu? Kalaulah Rina berwajah cantik, tentu Rina ada ramai kawan. Tidaklah asyik diejek setiap masa.” Rina kembali merungut dan mempersoalkan nasib dirinya yang malang.

“Tidak baik kamu mengeluh dan mempersoalkan takdir begitu, Rina. Itu semua kuasa Tuhan yang Maha Kuasa. Mempersoalkan semua itu bererti kamu mempersoalkan kuasa Tuhan. Kamu hendak menjadi manusia yang tidak bersyukur?” Puan Maimunah menasihati Rina agar tidak menyalahkan takdir yang telah disuratkan.

“Maafkan Rina, ibu.” Rina tertunduk sayu mendengar nasihat ibunya.

“Sudahlah, Rina. Tidak usahlah kamu memikirkan semua itu. Semua ini ada

## *Misteri Ahli Baru The Wannababes*

hikmahnya. Apa yang penting, kamu jujur terhadap diri sendiri dan ibu sentiasa menyayangi kamu walau apapun yang terjadi.” Puan Maimunah menguatkan dakapan eratnya kepada Rina. Rina hanya mampu tersenyum. Bersyukur masih punya ibu yang penyayang walau dalam apa jua keadaan.



Rina berlari pantas melepasi pagar Sekolah Menengah Seri Kinrara. Nasib baik dia masih sempat hadir ke sekolah sebelum loceng berbunyi. Kalau diikutkan hatinya, memang tidak mahu langsung hendak menjejakkan kaki ke sekolah yang menyeksa mental dan fikirannya. Dia sentiasa berasa gementar untuk hadir ke sekolah pada setiap hari kerana tidak sanggup hendak berhadapan dengan para pelajar yang terus mencemuh dirinya. Namun, memikirkan ibu bapanya, dia menggagahkan diri juga untuk hadir ke sekolah bagi menuntut ilmu. Biar suatu hari nanti dia menjadi insan yang berjaya dan terkenal. Waktu itu

baru menyesal semua orang yang pernah mengejeknya.

“Izrina, mana kerja sekolah kamu?” Persoalan Puan Asmida itu membuatkan Rina jadi tidak keruan. Bagaimana pula dia boleh terlupa hendak membawa kerja sekolah yang sudah disiapkannya semalam dengan penuh susah payah itu?

“Saya... saya sudah menyiapkannya cikgu. Tetapi saya terlupa hendak membawanya hari ini.” Tergagap-gagap Rina menjawab pertanyaan gurunya itu. Semua kerana kecuaiannya.

“Kamu terlupa membawanya ataupun kamu terlupa hendak menyiapkannya? Apa hendak jadi dengan kamu semua? Kerja sekolah yang sedikit pun tidak mahu buat!” Guru subjek matematik itu sudah bercekak pinggang memarahi dirinya dan beberapa orang pelajar lain yang pegun berdiri macam patung kaca kerana tidak menyiapkan kerja sekolah.



## *Misteri Ahli Baru The Wannababes*

“Betul cikgu! Saya sudah menyiapkannya. Cuma....” Belum sempat Rina hendak mempertahankan dirinya, gurunya terlebih dahulu menjatuhkan hukuman.

“Sudah! Jangan beri macam-macam alasan. Kamu semua didenda membersihkan kelas!” Mendengarkan hukuman tersebut, kesemua pelajar yang berdiri mengeluh lemah. Terpaksalah mereka pulang lewat pada hari itu. Tamat sesi persekolahan, Izrina dan beberapa orang pelajar lain awal-awal lagi sudah ditahan oleh Puan Asmida bagi melaksanakan denda mereka.

“Saya mahu kamu menyapu lantai sehingga bersih, mengelap cermin tingkap sehingga bersinar dan menyusun atur meja, kerusi dan buku sehingga kemas dan tersusun. Jangan balik selagi semuanya tidak selesai!” Puan Asmida terus beredar ke bilik guru selepas selesai memberikan arahan. Rina terus mencapai penyapu dan memulakan tugas menyapu. Namun, hanya dia seorang yang bekerja. Pelajar lain yang didenda hanya

duduk-duduk buat tidak tahu dan bersembang-sembang sahaja.

“Awak semua, marilah kita semua melakukan tugas ini bersama-sama. Jika banyak tenaga yang bekerja, cepatlah sedikit tugas ini selesai.” Rina memberanikan diri menegur rakan sekelas yang tidak pernah ditegurnya sebelum ini.

“Berani awak bercakap dengan saya ya! Awak fikir awak itu siapa? *Huh...* hendak tunjuk rajin konon.” Pelajar perempuan berambut tocang bernama Julia itu terus mengherdik Izrina apabila ditegur sedemikian rupa. Wajahnya mempamerkan riak jijik yang teramat sangat apabila memandang Rina.

“Yalah! Kami yang cantik ini manalah sesuai hendak memegang penyapu dan kain buruk mengelap tingkap? *Euww*, itu semua kerja orang gaji sahaja!” Syakila yang berdiri di sebelah Julia turut menunjukkan reaksi geli geleman melihat penyapu dan baldi berisi air dan kain buruk di hadapannya.

## *Misteri Ahli Baru The Wannababes*

“Sudahlah hodoh, banyak songeh pula! Kalau awak rajin sangat, awak sahajalah yang melakukan semua kerja ini!” Kali ini giliran seorang pelajar lelaki berambut cacak bernama Azman yang duduk di atas meja pula mengherdik Izrina yang berdiri terkulat-kulat memandang lantai.

“Kerja-kerja berat seperti ini hanya layak dilakukan oleh orang seperti awak! Maklumlah, ibu awak itu orang gaji. Tentu awak juga sudah biasa membantunya melakukan tugas-tugas seperti ini.” Julia menjeling Izrina dengan ekor mata yang tajam.

“Sudahlah! Baik kita semua pulang sahaja. Tidak sanggup saya hendak berlama-lama dengan raksasa hodoh mulut senget ini.” Pelajar lelaki yang seorang itu sudah berdiri dan menyandang beg gelas miliknya lantas bersedia untuk pulang.

“Yalah! Jika lama-lama di sini nanti kita semua turut terkena sumpahan hodoh dia itu.” Syakila juga sudah mengikut jejak

langkah Azman. Sempat lagi menghadiahkan kutukan penuh jelik kepada Izrina yang sudah mengalirkan air mata.

Terpaksalah Rina melakukan semua tugas yang diarahkan oleh gurunya itu seorang diri. Tidak dapatlah dia pulang awal dan membantu ayahnya mencuci pinggan di restoran seperti biasa. Air mata Rina mengalir deras saat melakukan semua tugas menyapu dan mencuci kelas itu. Dirinya terasa seperti Cinderella versi hodoh yang didera oleh kakak dan ibu tiri yang kejam. Pada kala dia gigih menyusun atur meja dan buku di dalam kelasnya, Puan Asmida telah kembali untk memeriksa hasil tugas para pelajarnya.

“Eh, mengapa hanya tinggal kamu seorang sahaja, Izrina? Mana yang lain?” Mata Puan Asmida membulat apabila melihat hanya Izrina sahaja yang ada di dalam kelas itu. Izrina tidak tahu hendak memberikan alasan apa kepada guru berkenaan. Sekiranya dia berterus terang, tentu pelajar-pelajar itu tidak akan melepaskan dirinya. Lebih teruk membulinya!

## *Misteri Ahli Baru The Wannababes*

“Mereka melarikan diri, ya! Berani sungguh budak-budak ini. *Haa...* siaplah mereka semua esok! Izrina, jika sudah siap semuanya, awak boleh balik.” Izrina hanya mengangguk mendengar kata-kata gurunya. Badannya terasa sengal dan letih kerana melakukan semua kerja seorang diri.



Keesokan harinya... Julia, Syakila dan Azman dipanggil menghadap Puan Asmida dan dimarahi kerana melarikan diri dan membiarkan Izrina menyiapkan semua tugas seorang diri. Sebagai hukumannya, mereka dikenakan denda mencuci tandas selama sebulan!

“Kurang ajar punya budak hodoh! Berani dia melaporkan kita semua kepada Puan Asmida!” Azman mengepal penumpuknya dengan begitu geram sekali.

“Kita mesti ajar dia cukup-cukup! Tidak fasal-fasal kita dikenakan hukuman lebih

berat!” Syakila juga berwajah bengang dan menghentak kaki dengan kuat sebagai tanda tunjuk perasaan.

“*Huh!* Tahulah apa saya hendak buat kepada raksasa tidak sedar diri itu!” Julia yang tidak puas hati dikenakan hukuman mencuci tandas selama sebulan itu sudah bersilang tangan dan tersenyum senget. Kepalanya ligat menyusun pelan jahat untuk mengenakan Izrina.



Rina berasa pelik melihat lipatan kertas berwarna merah yang diletakkan di atas mejanya. Dahinya berkerut seribu membelek lipatan kertas tersebut. Apabila Rina membuka lipatan kertas tersebut, dia mendapati bahawa kertas itu mengandungi surat daripada seseorang.

“*Eh*, ada surat! Siapa pula yang mengirimnya?” Laju anak mata Rina membaca satu per satu perkataan yang tertera di atas surat itu.

*Kepada Izrina,*

*Saya teringin hendak mengenali awak dengan lebih rapat. Jujur saya katakan, saya kasihan melihat awak asyik diejek dan dikutuk oleh para pelajar lain. Sudikah awak menjadi rakan saya? Jika awak sudi, saya tunggu kehadiran awak di belakang perpustakaan pada waktu rehat.*

*Yang benar,*

*Ramzan.*

“Ramzan? Ramzan kapten bola keranjang itu? Biar betul!” Terbeliak biji mata Rina sesudah membaca surat berkenaan antara percaya dengan tidak.

“Ah, jangan-jangan ada pelajar yang sengaja hendak mengenakan saya. Tetapi, bagaimana pula sekiranya memang benar Ramzan yang mengutuskan surat ini?” Rina bermain teka teki dengan dirinya sendiri. Hendak percaya ataupun tidak percaya dengan kenyataan tersebut.

“*Hmm...* tidak salah mencuba. Jika benar Ramzan yang memberi surat ini, tentu dia akan menanti di sana. Jika tiada siapa-siapa, saya pergi sahajalah dari situ.” Rina akhirnya membuat keputusan untuk ‘bersemuka’ dengan Ramzan, pengirim surat berkenaan. Tidak sabar rasanya dia hendak menunggu waktu rehat. Inilah buat pertama kali dalam hidupnya ada pelajar yang sudi hendak berkenalan dengannya.

Jantung Izrina berdegup kencang saat kakinya melangkah menuju ke lokasi yang dijanjikan oleh pengirim surat berkenaan. Dia terlalu teruja, tetapi tidak berharap pada masa yang sama. Namun, alangkah terkejutnya Rina apabila melihatkan Ramzan yang sedang



## *Misteri Ahli Baru The Wannababes*

berdiri tegak di belakang perpustakaan sambil tersenyum. Tidak disangka bahawa kapten bola keranjang yang kacak serta menjadi pujaan ramai gadis itu sedang berdiri menanti dirinya di situ.

“Datang juga awak... saya fikir awak tidak sudi hendak berjumpa saya,” kata-kata Ramzan itu diselangi dengan senyuman manis mengusik jiwa. Rina sempat mencubit pahanya untuk memastikan dirinya tidak bermimpi.

“Saya... saya tidak sangka awak sudi hendak berkenalan dengan saya. Saya ingat ada yang hendak mempermainkan saya.” Rina hanya menunduk sambil tersenyum-senyum sendiri. Seronok betul perasaannya ketika itu.

“Mengapa pula awak kata begitu?” Ramzan mula berjalan menghampiri dirinya.

“Siapalah yang sudi hendak berkawan dengan saya. Wajah saya ini hodoh. Semua orang mengejek dan menjauhi saya.” Rina tidak mahu kelihatan terlalu teruja dan hanya merendah diri.

“*Hah!* Sedar diri pun hodoh! Jadi mengapa awak berani sangat menunjukkan muka awak di hadapan saya?” Perubahan intonasi dalam suara Ramzan itu mengejutkan Rina.

“Apa... apa awak kata?” Rina tergamam memandang Ramzan dengan terkebil-kebil. Baru sebentar tadi Ramzan tersentum ke arahnya. Mengapa pula sekarang berubah personaliti secara tiba-tiba?

“Sudahlah hodoh, pekak pula? Saya kata awak hodoh! Mengapa berani hendak menayangkan muka awak di hadapan orang ramai? Muka seperti awak ini hanya layak duduk dalam zoo sahaja!” Serentak dengan kata-kata hinaan Ramzan itu, kedengaran suara gelak ketawa yang hingar-bingar di sekeliling perpustakaan. Kelihatan para pelajar yang sudah bersiap sedia bersembunyi untuk mengetawakan Izrina beramai-ramai diketuai oleh Julia.

“*Hei*, raksasa! Cerminlah muka awak itu! Ada hati hendak berangan disukai oleh jejaka

## *Misteri Ahli Baru The Wannababes*

paling kacak di sekolah!” Suara Julia lantang didengari oleh semua pelajar yang ada di situ.

“*Hoi*, makhluk asing hodoh! Balik ke planet asalmu!” Beberapa orang pelajar lain turut serta mengejek dan menghina Izrina di hadapan semua orang. Tidak semena-mena, Rina terus diserang dengan balingan telur secara bertubi-tubi ke arahnya. Habis basah lencun satu badan dengan bau hamis telur yang melekit-lekit. Rupa-rupanya semua ini telah dirancang oleh Julia dan Ramzan. Angan-angan indahinya sebentar tadi musnah sekelip mata. Dia seharusnya sedar diri bahawa tiada siapa yang sudi hendak berkenalan rapat dengannya. Apatah lagi kapten bola keranjang paling popular di sekolah. Bagaimanalah dia boleh terumpan ke dalam perangkap itu.

Rina tidak dapat menanggung malu yang melampau lalu melarikan diri sambil menangis teresak-esak. Dia tidak pernah dimalukan dengan sebegitu teruk sekali. Lantaran insiden itu, dua hari Rina tidak hadir ke sekolah. Dia membuat alasan tidak sihat dan berkurung

mengenang nasib dirinya. Kalau boleh, dia tidak mahu lagi menjejakkan kaki ke Sekolah Menengah Seri Kinrara itu.



“Ayah, boleh saya minta sesuatu daripada ayah?” Rina mendekati ayahnya yang sedang mencuci pinggan mangkuk dengan gigih.

“Kamu mahu minta apa? Cakaplah.” Encik Jantan memberhentikan tugas membasuh pinggannya dan memandang ke arah Izrina.

“Bolehkah jika Rina hendak berpindah ke sekolah lain?” Permintaan Izrina itu membuatkan Encik Jantan berkerut dahi.

“Mengapa pula tiba-tiba hendak berpindah ke sekolah lain?”

“Sebenarnya... sebenarnya...,” Rina serba salah hendak menceritakan hal sebenar yang menimpa dirinya.

## *Misteri Ahli Baru The Wannababes*

“Sebenarnya apa? Ceritalah pada ayah.” Dengan penuh terpaksa, Izrina menceritakan segala-galanya dari awal sehingga habis. Dia menceritakan bagaimana dirinya dimalukan sedemikian rupa di sekolah dan tidak sanggup lagi hendak bersemuka dengan semua orang.

“Kalau sudah begitu kata kamu, ayah ikut sahajalah. Nanti ayah bincangkan dengan Dato’ Megat. Sebabnya selama ini yuran sekolah kamu dibayar olehnya.” Dato’ Megat Tuah memang bermurah hati membantu para pekerjaanya yang kurang bernasib baik. Justeru, perbelanjaan sekolah Izrina semuanya dibiayai oleh Dato’ Megat Tuah kerana kedua-dua ibu bapa Rina bekerja dengan beliau. Rina hanya mengangguk tanda faham.

“Terima kasih kerana memahami situasi saya, ayah.” Rina memeluk ayahnya dengan erat.

Izrina dan ayahnya berjalan beriringan menuju ke pejabat Dato’ Megat Tuah yang terletak di tingkat dua restoran mewah

itu. Baru sahaja mereka hendak mengetuk pintu bilik Dato' Megat Tuah, beliau terlebih dahulu membuka pintu dan bergegas hendak meninggalkan pejabat.

"Err... Dato' saya ada hal penting yang hendak dibincangkan." Encik Jantan memberanikan diri menyuarakan hasratnya.

"Ada hal apa, Atan? Saya sudah terlewat hendak ke mesyuarat." Dato' Megat Tuah mengerling ke arah jam tangannya yang berkilau itu.

"Err... jika Dato' sedang sibuk tidak mengapalah. Kita bincang lain kali sahaja." Encik Jantan terus menunduk hormat dan berlalu pergi. Dia tidak mahu mencampur adukkan hal peribadi dengan hal kerja majikannya.

"Nanti dulu, Atan! Alang-alang kamu sudah ada di sini, apa kata kamu tolong bawa saya ke Menara Bangsar. Pemandu saya bercuti kecemasan pula. Nanti kita bincang sekali apa yang ingin awak bincangkan dalam kereta."

## *Misteri Ahli Baru The Wannababes*

“Baiklah Dato’. Rina, mari ikut sekali.” Encik Jantan tersenyum senang mendengar pelawaan Dato’ Megat Tuah. Mata Rina juga turut bersinar-sinar dengan harapan. Semoga Dato’ Megat Tuah memperkenankan permintaannya untuk berpindah sekolah.

Kereta BMW 5 series berwarna putih itu dipandu dengan penuh cermat oleh Encik Jantan. Izrina duduk di kerusi hadapan bersebelahan bapanya. Manakala Dato’ Megat Tuah pula kelihatan sedikit resah di tempat duduk belakang melihatkan gaya pemanduan Encik Jantan yang begitu berhemah dan berhati-hati itu.

“Err... Dato’ berkenaan perkara yang saya ingin bincangkan itu.” Encik Jantan cuba memulakan bicara. Namun, belum sempat dia menghabiskan kata-kata, Dato’ Megat Tuah lebih dahulu memotong percakapannya.

“Atan! Kamu bawalah kereta ini laju sedikit! Saya sudah lewat sangat! Mengapa pula memandu terkedek-kedek macam kura-kura?”

Dato' Megat Tuah kelihatan tidak senang duduk. Sekejap-sekejap dia memandang skrin telefon, kemudian dia mengerling jam tangannya pula.

“Tetapi, Dato’...” Encik Jantan mengerling ke arah meter kereta berkenaan. Rasanya dia sudah memandu dengan agak laju. Malah sudah melebihi 100 km/j had laju yang dibawa.

“Jangan membantah lagi! Cepat pandu laju sedikit! Saya tidak mahu terlepas mesyuarat penting ini.” Mendengarkan arahan Dato' Megat Tuah, Encik Jantan terpaksa akur lalu menambahkan kelajuan kenderaan yang dipandunya. Menderum-derum bunyi enjin kereta tersebut. Rina yang duduk di sebelah juga sudah mempamerkan wajah bimbang kerana kereta dipandu dengan begitu laju sekali.

“Kamu ini tidak faham bahasa ya? Saya sudah suruh pandu dengan laju mengapa masih lembab? Jangan risau disaman! Saya boleh bayar saman yang tidak seberapa itu!” Dato’



## *Misteri Ahli Baru The Wannababes*

Megat Tuah masih tidak berpuas hati dengan kelajuan yang dibawa oleh Encik Jantan. Encik Jantan tidak faham laju mana lagi yang Dato' Megat Tuah inginkan.

“Sudah! Berhentikan kereta di tepi jalan! Biar saya yang pandu!” Setelah didesak berkali-kali oleh Dato' Megat Tuah, akhirnya terpaksa Encik Jantan mengalah dan bertukar tempat duduk dengan beliau. Kini Dato' Megat Tuah yang memandu kereta dan dia duduk di kerusi belakang pula. Izrina yang duduk di hadapan juga berasa kekok dengan situasi itu. Dato' Megat Tuah memandu kereta tersebut dengan begitu laju sekali. Beliau menekan minyak pada tahap maksima membuatkan kereta yang mereka naiki bagaikan terbang di udara.

Pada kala Dato' Megat Tuah ligat memandu seperti membawa kereta lumba, secara tiba-tiba lori kontena di hadapan mereka membuat lencongan tanpa signal. Dato' Megat Tuah tidak sempat menekan brek kecemasan lalu hilang kawalan. Kereta yang mereka naiki berpusing dua kali di atas jalan raya sebelum

terbabas melanggar tiang elektrik. Kereta BMW itu remuk dengan begitu teruk sekali. Bahagian enjin kereta sudah berasap-asap. Nasib baiklah kesemua mereka tidak mengalami kecederaan yang parah.

“Semua tidak apa-apa?” Encik Jantan yang hanya mengalami luka ringan di bahagian lengan menjadi orang pertama yang memboloskan diri keluar dari kereta tersebut.

“Saya tidak apa-apa, ayah. Hanya benjol sedikit.” Rina mengusap dahinya yang terhantuk di cermin hadapan kereta. Terasa sedikit benjolan di dahi. Mujur tiada darah yang mengalir.

“Saya juga tidak apa-apa. Tetapi kaki saya tersepit. Tolong keluarkan saya, Atan!” Encik Jantan terus bergegas membantu mengeluarkan kaki Dato’ Megat Tuah yang tersepit. Beberapa orang awam turut berhenti untuk membantu mereka. Dengan bantuan orang ramai, akhirnya kaki Dato’ Megat Tuah berjaya dikeluarkan.

## *Misteri Ahli Baru The Wannababes*

“Rina, kamu juga cepat keluar dari sebelah sana.” Encik Jantan memapah Dato’ Megat Tuah ke pinggir jalan. Izrina hanya mengangguk mendengar arahan ayahnya.

“Ayah, pintu ini tidak boleh dibuka!” Rina menolak-nolak pintu kereta yang sudah kemek itu. Ternyata fungsi pintu berkenaan sudah rosak akibat kemalangan itu.

“Tunggu sebentar. Nanti ayah cuba buka dari luar.” Namun, belum sempat Encik Jantan menghampiri pintu kereta berkenaan, kelihatan percikan api dari bahagian enjin kereta. Tidak sampai beberapa, bonet depan kereta BMW itu mula marak. Encik Jantan tergamam melihat insiden di hadapan matanya itu.

“RINA!” Encik Jantan hendak meluru ke arah kereta yang dijilat api itu, namun tindakannya dihalang oleh beberapa orang awam yang ada kerana terlalu berbahaya. Hanya raungan anaknya yang kedengaran.

“Anak saya! Tolong selamatkan anak saya!” Encik Jantan sudah meraung dan menangis

teresak-esak. Pihak bomba yang kebetulan baru sahaja tiba terus berusaha memadamkan api dan mengeluarkan Izrina yang terperangkap di dalam kereta itu. Izrina cedera parah di bahagian muka dan tidak sedarkan diri. Gadis malang itu segera dikejarkan ke hospital berhampiran bagi menerima rawatan kecemasan.



“Bagaimana dengan anak saya doktor?” Encik Jantan dan Puan Maimunah bergegas mendapatkan doktor yang keluar dari bilik rawatan.

“Keadaannya stabil. Tetapi wajahnya melecur teruk. Mungkin kesan parut terbakar akan kekal selama-lamanya.” Mendengarkan penjelasan doktor berkenaan, Puan Maimunah serta-merta jatuh pengsan kerana terlalu terkejut. Jururawat yang berada di sekitar terus memapah Puan Maimunah. Encik Jantan

## *Misteri Ahli Baru The Wannababes*

turut menjadi panik. Dia segera meluru ke arah Dato' Megat Tuah yang turut berada di situ.

“Ini semua salah Dato’! Jika Dato’ tidak memandu dengan laju, semua ini tidak akan berlaku! Saya akan saman Dato’ di mahkamah!” Mendengarkan perkataan saman, Dato’ Megat Tuah menjadi gusar.

“Sabar, Atan. Kita boleh bincang perkara ini baik-baik.” Dato’ Megat Tuah cuba menenangkan Encik Jantan yang sedang galau itu.

“Apa hendak dibincangkan lagi, Dato’? Anak saya akan berparut seumur hidup kerana kecuaiannya Dato’! Dato’ hendak saya bersabar macam mana lagi?” Tangisan Encik Jantan semakin kuat dan tersedu-sedu.

“Saya tahu saya bersalah dan minta maaf banyak-banyak. Beginilah, saya ada jalan penyelesaian untuk Izrina. Itu pun jika Atan bersetuju dengan cadangan ini.” Dato’ Megat Tuah cuba memancing dan memujuk Encik Jantan.

“Penyelesaian? Apa maksud Dato’?” Encik Jantan kelihatan sedikit tenang. Namun, dahinya berkerut tidak mengerti penyelesaian yang dikatakan Dato’ Megat Tuah.

“Kita lakukan pembedahan plastik ke atas Izrina bagi menyembunyikan kesan parut terbakar. Saya kenal seorang pakar pembedahan plastik yang paling terbaik dari Korea. Saya sedia menanggung segala perbelanjaannya dan apapun syaratnya. Tetapi, Atan harus melupa-kan perkara ini dan kita selesaikan di sini sahaja. Tidak perlu saman-menyaman.” Tawaran Dato’ Megat Tuah itu membuatkan Encik Jantan terdiam dan berfikir panjang. Dia tidak sanggup lagi melihat Izrina menderita diejek, dicaci dan dihina kerana memiliki rupa yang hodoh. Setelah menimbang tara baik dan buruk semua perkara, Encik Jantan memberi kata putus.

“Baiklah. Saya ikut cadangan Dato’.” Mereka berdua berjabat tangan tanda persetujuan.



## **Sebulan kemudian...**

“Ibu, Rina takut....” Rina menggenggam tangan ibunya dengan erat. Kepalanya berbalut macam mumia setelah menjalani pembedahan plastik menyembunyikan kesan parut di wajahnya.

“Jangan risau. Ibu dan ayah ada di sini.” Puan Maimunah dan Encik Jantan menggenggam jemari Izrina dengan erat. Tersalur kasih sayang antara tiga beranak itu.

“Doktor buka balutan ini sekarang ya.” Perlahan-lahan tangan doktor tersebut membuka balutan berlapis-lapis di wajah Izrina. Tidak berapa lama kemudian, Rina dapat merasakan hembusan angin menyentuh pipinya. Ini bererti balutan sudah dibuka dengan sempurna.

“Adik mahu lihat wajah adik?” Doktor berkenaan menghulurkan cermin kepada

Rina. Laju Rina menggeleng kepalanya. Dia tidak bersedia hendak menerima kenyataan wajahnya yang terbakar.

“Jangan takut, Rina. Tengoklah wajah kamu.” Encik Jantan mengambil cermin tersebut daripada tangan doktor lalu menghulurkannya kepada Rina.

Rina menarik nafas dalam-dalam lalu memandang ke arah cermin yang diberikan. Alangkah terperanjatnya Rina melihat biasan wajahnya di atas permukaan cermin berkenaan. Dia seperti tidak percaya dengan apa yang dilihatnya. Tanpa diduga, air matanya mengalir laju.

“Ibu... ayah.... mengapa wajah Rina jadi begini? Apa yang telah berlaku sebenarnya?” Encik Jantan menceritakan berkenaan perjanjiannya dengan Dato’ Megat Tuah kepada Rina. Rina hanya mampu menangis terharu mendengar penjelasan ayahnya.

“Ibu, Rina sudah cantik. Rina tidak hodoh lagi,” Rina memeluk ibunya sambil menangis



## *Misteri Ahli Baru The Wannababes*

teresak-esak. Wajah Rina kini sudah berubah 100 peratus. Tiada lagi hidung yang kemek. Bibir yang sumbing dan gigi yang jongang juga sudah hilang. Kulit wajahnya juga bersih tanpa sebarang jerawat degil yang bernanah. Semuanya hasil pembedahan plastik yang berjaya. Wajahnya kini bukan sahaja tidak lagi jatuh dalam kategori hodoh malahan sudah setanding dengan artis kpop dari Korea. Tiada lagi panggilan makhluk asing! Selamat tinggal gelaran raksasa!

“Rina, Dato’ juga sudah daftarkan Rina di sekolah lain yang berhampiran dengan rumahnya. Kita akan berpindah ke sana dan mulakan hidup baru ya...” Kata-kata Encik Jantan membuatkan Rina tersenyum gembira. Inilah permulaan baru bagi seorang gadis yang bernama Izrina Amanda....

**~ TAMAT ~**

# MAHU DAPATKAN BUKU BLINK?



**SILA WHATSAPP  
NOMBOR TELEFON INI :  
0193365205  
(WHATSAPP SAHAJA)**